



Broj: Ž-SA-06-1207/17

Datum: 13.06.2018.

Preporuka broj: P-139/18

Predsjedništvo Bosne i Hercegovine
Sekretarijat
Maršala Tita broj 1
71 000 Sarajevo

na znanje Dženana Selimbegovića

na znanje Sanele Prašović-Gadžo

PREPORUKA
OMBUDSMANA ZA LJUDSKA PRAVA BOSNE I HERCEGOVINE

I. Uvod

Ombudsmeni za ljudska prava Bosne i Hercegovine, otvorili su po službenoj dužnosti, a na temelju saznanja iz medija istražni postupak koji se odnosi na vrijeđanje novinarki Sanele Prašović-Gadžo i Arijane Saračević-Helać, od strane zamjenika generalnog sekretara Predsjedništva Bosne i Hercegovine Dženana Selimbegovića i predmet je registriran pod brojem Ž-SA-06-1207/17.

Predmet broj Ž-SA-06-1207/17 razmatran je u okviru Zakona o zabrani diskriminacije¹ i Zakona o ombudsmanu za ljudska prava Bosne i Hercegovine².

II. Činjenično stanje

Ombudsmeni za ljudska prava Bosne i Hercegovine pokrenuli su postupak u predmetu broj Ž-SA-06-1207/17, iz razloga što su brojni mediji prenijeli informaciju da je zamjenik generalnog sekretara Predsjedništva Bosne i Hercegovine - Dženan Selimbegović, na svom ličnom profilu na društvenoj mreži „facebook“ dana 30.11.2017. godine u 21.05.sati objavio status slijedećeg sadržaja:

„Gledam trailer za nekakav intervju na BHT-u. Sjele dvije „polovnjače“ jedna nasuprot druge. Jedna loše izblajhana, a druga sa sfušerenim kolagenom u usnama. Ljudi ih zovu novinarkama. I sada ova izblajhana, mrtva-hladna kroz čuperak loše njegovane kose, izvali da je BiH u ratu odbranila u stvari šaka novinara na BHT-u. Ništa Armija BiH, ništa heroji, ništa Alija ... samo ona i njena raja... ☹ ☹.“

¹ Zakon o zabrani diskriminacije (“Službeni glasnik BiH” br: 59/09 i 66/16)

² Zakon o ombudsmanu za ljudska prava Bosne i Hercegovine (“Službeni glasnik BiH, br: 19/02, 34/05, 32/06)

Ombudsmani za ljudska prava Bosne i Hercegovine uputili su dana 06.12.2017. godine akt Predsjedništvu Bosne i Hercegovine s upitom što je u konkretnom slučaju poduzeto kako bi se navedeno ponašanje sankcioniralo, a isti akt upućen je Dženanu Selimbegoviću.

Ombudsmani za ljudska prava Bosne i Hercegovine zaprimili su dana 19.12.2017. godine izjašnjenje Dženana Selimbegovića u kojem je navedeno:

„Naime, ovim putem ističem da nikad, a posebno ne u svojstvu državnog službenika, nisam niti prema kome različito postupao na način i iz osnova kako to navodi član 2. stav 1. i 2., te u vezi s njim i član 4. Zakona o zabrani diskriminacije („Službeni glasnik BiH“, broj 59/09 i 66/16).

Facebook status čiji sadržaj navodite u svom dopisu je objavljen, kako ste i naveli, na mom ličnom facebook profilu i kao takav predstavlja moju privatnu stvar, koja nema veze sa mojim poslovima državnog službenika, niti sa institucijom u kojoj radim.

Međutim, iz poštovanja prema važnom poslu koji obavlja Institucija ombudsmena za ljudska prava u Bosni i Hercegovini, osjećam dužnost da Vam pojasnim određene stvari.

Navedeni status je bio deskriptivnog sadržaja i nije spomenuto nijedno ime i prezime. Međutim uvidio sam da je jedan termin u tom statusu, iako upotrebljen pod navodnicima, uvredljive prirode te sam izrazio žaljenje zbog zloupotrebe istog i to ponovo na mom ličnom facebook profilu 03.12.2017. godine (nedjelja):

*„Evo vjerujem da je termin „polovnjača“, makar ga stavio pod navodnike, stereotip koji vrijeda žene generalno. Zbog toga ovim putem želim zbog njegove upotrebe i editujem ga u svom statusu.
„Samo glup čovjek ne mijenja svoje mišljenje“.*

Međutim gospođa Sanela Prašović-Gadžo, na svom facebook profilu je objavila status, koji je sama okarakterizovala kao javno obraćanje, sa niz inkriminacija na moj račun (što je njen lični stav na koji ima puno pravo), ali je to ilustrovala fotografijama mog maloljetnog sina i moje porodice.

...

Vjerujem da će uvažena Institucija ombudsmena u Bosni i Hercegovini pravilno zaključiti ima li ili ne ovdje kršenja prava djeteta, jer koliko mi je poznato u okviru Vaše Institucije djeluje i Odjel koji brine o zaštiti prava djeteta³.

Ombudsmani za ljudska prava Bosne i Hercegovine, a uzimajući u obzir činjenicu da su mediji prenijeli status koji je Sanela Prašović-Gadžo objavila na svom facebook profilu na dan 03.12.2017. godine, ovom prilikom prenose sadržaj istog u cjelosti:

“Obraćam se Predsjedništvu Bosne i Hercegovine,

Cijenjeni predsjedavajući Predsjedništva Dragan Čović,

članovi Predsjedništva BiH Mladen Ivanić i Bakir Izetbegović,

³ Izjašnjenje imenovanog će biti registrirano kao žalba.

kao osoba koja 26 godina radi posao novinara i urednika u Bosni i Hercegovini od Vas kao kolektivnog šefa države očekujem da na najoštriji način sankcionirate ponašanje uposlenika državne institucije, Predsjedništva BiH.

Riječ je o zamjeniku sekretara Predsjedništva BiH Dženanu Selimbegoviću koji u javnom prostoru koristi jezik kojim vrijeđa, ponižava i potcjenjuje druge osobe. Takvo ponašanje ne samo da narušava ugled osoba o kojima drsko, primitivno i bezobrazno piše, već nedvojbeno narušava i ugled institucije koju predstavlja i u kojoj radi a to je u konkretnom slučaju Predsjedništvo Bosne i Hercegovine.

Gosp. Čoviću, Vas kao predsjedavajućeg Predsjedništva BiH pozivam da javno osudite bahato i primitivno ponašanje uposlenika Predsjedništva BiH te da protiv istog poduzmete mjere sankcioniranja. Vokabular koji Dženan Selimbegović koristi priliči ulici a ne najvišoj državnoj instituciji.

Osobe koje su aplaudirale ovom skandaloznom postu a posebno državne službenike poput predsjednika Asocijacije mladih SDA Salko Zildžić, koji je ujedno i savjetnik federalnog ministra unutrašnjih poslova Aljoše Čampare pozivam da nauče ponešto o poštovanju drugih osoba, te da oni koji poput Zildžića i Selimbegovića rade u državnim institucijama sebi ne mogu dopustiti brutalno i primitivno vrijeđanje drugih, kao niti odobravanje takvog ponašanja.

Arijana Saračević Helač i ja smo bile ratne reporterke, cijeli rat smo provele u našoj BiH. Bile smo u rovovima sa borcima i to naši heroji znaju.

Jednako kao što cijela BiH zna da je TVBiH 2.maja povezivanjem naših tv linkova i veza spasila ovu državu kada je predsjednik Alija Izetbegović bio zarobljen. Očito to samo ne zna i ne razumije izvjesni Dženan Selimbegović.

I na kraju, drago mi je što će moj post vidjeti i diplomate koji obnašaju veoma visoke funkcije predstavnika mnogih država u BiH kao što su SAD, Njemačke, Velike Britanije i drugih, te oni iz misija OSCE, NATO, USAID, EU... kako bi uvidjeli sa kakvim ljudima imaju posla a ti isti obnašaju veoma visoke funkcije u Predsjedništvu BiH.

Slike u prilogu su sa Facebook profila Dženana Selimbegovića, zamjenika sekretara Predsjedništva Bosne i Hercegovine!”

III. Relevantno zakonodavstvo

Zakon o ombudsmanu za ljudska prava Bosne i Hercegovine⁴

Član 1.

1. Ombudsman za ljudska prava Bosne i Hercegovine je nezavisna institucija uspostavljena u cilju promoviranja dobre uprave i vladavine prava, zaštite prava i sloboda fizičkih i pravnih lica, kako je zajamčeno posebno Ustavom Bosne i Hercegovine i međunarodnim sporazumima koji se nalaze u dodatku tog Ustava...

⁴ Službeni glasnik Bosne i Hercegovine br. 32/00, 19/02, 35/04 i 32/06

Član 2.

- 1. Institucija će razmatrati predmete koji se odnose na slabo funkcioniranje ili povrede ljudskih prava i sloboda počinjene od strane bilo kojeg tijela vlasti u Bosni i Hercegovini.*
- 2. Institucija će djelovati po prijemu žalbe ili ex officio....*

Član 18.

- 1. Svaka fizička ili pravna osoba koja tvrdi da ima legitiman interes može se obratiti Instituciji bez ikakvih ograničenja. Nacionalnost, državljanstvo, mjesto boravka, spol, maloljetnost, etničko porijeklo, religija, pravna nesposobnost, zatvor bilo koje vrste, i općenito uzevši, posebni odnosi sa i ovisnost o nekom organu vlade ne mogu ograničiti pravo ulaganja žalbe Instituciji.*
- 2. Žalba Instituciji ili njena intervencija neće povući bilo kakve krivične, disciplinske ili druge sankcije za podnosioca žalbe kao ni bilo kakvu neugodnost ili diskriminaciju za njega.*

Član 25.

- 1. Tijela vlasti u Bosni i Hercegovini obavezni su Instituciji pružiti odgovarajuću pomoć u istrazi i vršenju kontrole.*

Član 32.

- 4. Kada, nakon razmatranja predmeta, ombudsman ustanovi da način na koji je zakon primjenjen vodi nepravičnim rezlutatima, on može uputiti nadležnom organu vlade preporuke koji bi dovele do pravičnog rješenja situacije predmetnog pojedinca. Ombudsman može nadležnom organu dati prijedlog mjera čija primjena bi vjerovatno poboljšala situaciju na koju se žali, uključujući isplatu odštete, i u godišnjem ili specijalnom izvještaju Institucije dati prijedlog za izmjene i dopune zakona i drugih propisa kada on smatra da je to potrebno.*

Zakon o zabrani diskriminacije⁵

Član 2. (Diskriminacija)

(1) Diskriminacijom će se, u smislu ovog zakona, smatrati svako različito postupanje uključujući svako isključivanje, ograničavanje ili davanje prednosti utemeljeno na stvarnim ili pretpostavljenim osnovama prema bilo kojem licu ili grupi lica i onima koji su s njima u rodbinskoj ili drugoj vezi na osnovu njihove rase, boje kože, jezika, vjere, etničke pripadnosti, invaliditeta, starosne dobi, nacionalnog ili socijalnog porijekla, veze s nacionalnom manjinom, političkog ili drugog uvjerenja, imovnog stanja, članstva u sindikatu ili drugom udruženju, obrazovanja, društvenog položaja i pola, seksualne orijentacije, rodnog identiteta, spolnih karakteristika, kao i svaka druga okolnost koja ima za svrhu ili posljedicu da bilo kojem licu onemogući ili ugrožava priznavanje, uživanje ili ostvarivanje, na ravnopravnoj osnovi, prava i sloboda u svim oblastima života.

(2) Zabrana diskriminacije primjenjuje se na sve javne organe kao i na sva fizička ili pravna lica, i u javnom i u privatnom sektoru, u svim oblastima, a naročito: zaposlenja, članstva u profesionalnim organizacijama, obrazovanja, obuke, stanovanja, zdravstva, socijalne zaštite, dobara i usluga namijenjenih javnosti i javnim mjestima, te obavljanja privrednih aktivnosti i javnih usluga.

⁵ Službeni glasnik Bosne i Hercegovine, br. 59/05, 66/16

Član 3. (Oblici diskriminacije)

(1) Neposredna diskriminacija je svako različito postupanje po osnovama određenim članom 2. ovog zakona, odnosno svako djelovanje ili propuštanje djelovanja kada je neko lice ili grupa lica dovedena ili je bila ili bi mogla biti dovedena u nepovoljniji položaj, za razliku od nekog drugog lica ili grupe lica u sličnim situacijama.

(2) Posredna diskriminacija podrazumijeva svaku situaciju u kojoj naizgled neutralna odredba, kriterij ili praksa ima ili bi imala učinak dovođenja nekog lica ili grupe lica, u odnosu na osnove definirane u članu 2. stav (1) ovog zakona, u nepovoljan ili manje povoljan položaj u odnosu na druga lica.

Član 4. (Ostali oblici diskriminacije)

(1) Uznemiravanje je svako neželjeno ponašanje uzrokovano nekom od osnova iz člana 2 stav (1) ovog zakona koje ima za cilj ili stvarno predstavlja povredu dostojanstva osobe i stvaranje zastrašujućeg, neprijateljskog, degradirajućeg, ponižavajućeg ili uvredljivog okruženja.

(2) Seksualno uznemiravanje je svaki oblik neželjenog verbalnog, neverbalnog ili fizičkog ponašanja spolne prirode čiji je cilj ili efekat povreda dostojanstva lica, posebno kada se njime stvara zastrašujuće, neprijateljsko, degradirajuće, ponižavajuće ili uvredljivo okruženje.

(3) Mobing je oblik nefizičkog uznemiravanja na radnom mjestu koji podrazumijeva ponavljanje radnji koje imaju ponižavajući efekat na žrtvu čija je svrha ili posljedica degradacija radnih uslova ili profesionalnog statusa zaposlenog.

...

(5) Izdavanje naloga drugima za vršenje diskriminacije i pomaganje drugima prilikom diskriminacije, poticanje na diskriminaciju smatra se oblikom diskriminacije. ...

Član 6. (Oblast primjene)

(1) Ovaj zakon primjenjuje se na postupanje svih javnih tijela na nivou države, entiteta, kantona i Brčko Distrikta Bosne i Hercegovine, općinskih institucija i tijela, te pravnih lica s javnim ovlaštenjima, kao i na postupanje svih pravnih i fizičkih lica, u svim ...oblastima života..."

Član 7. (Centralna institucija za zaštitu od diskriminacije)

(1) Centralna institucija nadležna za zaštitu od diskriminacije je Ombudsmen za ljudska prava Bosne i Hercegovine (u daljnjem tekstu: Ombudsmen Bosne i Hercegovine).

(2) Ombudsmen Bosne i Hercegovine postupa u skladu s ovim zakonom i Zakonom o ombudsmenu za ljudska prava BiH na način da u okviru svoje nadležnosti:

a) zaprima pojedinačne i grupne žalbe u vezi s diskriminacijom;

b) fizičkim i pravnim licima koja su podnijela žalbu zbog diskriminacije daje potrebna obavještenja o njihovim pravima i obavezama, te mogućnostima sudske i druge zaštite;

c) povodom žalbe Ombudsmen Bosne i Hercegovine može odlučiti da ne prihvati žalbu ili da pokrene istražni postupak u skladu s posebnim propisima;

d) predlaže pokretanje postupka medijacije u skladu s odredbama Zakona o medijaciji;

e) prikuplja i analizira statističke podatke o slučajevima diskriminacije;

f) podnosi godišnji, a prema potrebi i vanredne izvještaje o pojavama diskriminacije Parlamentarnoj skupštini Bosne i Hercegovine, Parlamentu Federacije Bosne i Hercegovine, Narodnoj skupštini Republike Srpske i Skupštini Brčko Distrikta Bosne i Hercegovine;

g) informira javnost o pojavama diskriminacije;

- h) na vlastitu inicijativu, provodi istraživanja u oblasti diskriminacije;
- i) daje mišljenja i preporuke s ciljem sprečavanja i suzbijanja diskriminacije, te predlaže odgovarajuća zakonska i druga rješenja nadležnim institucijama u Bosni i Hercegovini;
- j) ima pravo da pokreće i učestvuje u postupku za zaštitu od diskriminacije za prekršaje propisane ovim zakonom;
- k) prati zakonodavstvo i daje savjete zakonodavnim i izvršnim organima;
- l) radi na promociji ovog zakona, informira javnost, podiže svijest, provodi kampanje i na druge načine aktivno promovira borbu protiv diskriminacije u svrhu njene prevencije...

IV. Nalaz i mišljenje Ombudsmena za ljudska prava Bosne i Hercegovine

Ombudsmani za ljudska prava Bosne i Hercegovine prilikom donošenja odluke u predmetu broj Ž-SA-06-1207/17 utvrdili su slijedeće:

- Dženan Selimbegović, državni službenik, zamjenik generalnog sekretara Sekretarijata Predsjedništva Bosne i Hercegovine, je dana 30.11.2017. godine u 21.05. sati, na svom ličnom facebook profilu objavio slijedeći status:

„ Gledam trailer za nekakav intervju na BHT-u. Sjele dvije „polovnjače“ jedna nasuprot druge. Jedna loše izblajhana, a druga sa sfušerenim kolagenom u usnama. Ljudi ih zovu novinarkama. I sada ova izblajhana, mrtva-hladna kroz čuperak loše njegovane kose, izvali da je BiH u ratu odbranila u stvari šaka novinara na BHT-u. Ništa Armija BiH, ništa heroji, ništa Alija ... samo ona i njena raja... ☹ ☹.“

Ombudsmani za ljudska prava Bosne i Hercegovine ističu slijedeće:

Član 2. Zakona o zabrani diskriminacije glasi:

*1. Diskriminacijom će se, u smislu ovog zakona, smatrati svako različito postupanje uključujući svako isključivanje, ograničavanje ili davanje prednosti utemeljeno na stvarnim ili pretpostavljenim osnovama prema bilo kojem licu ili grupi lica **i onima koji su s njima u rodbinskoj ili drugoj vezi** na osnovu njihove rase, boje kože, jezika, vjere, etničke pripadnosti, **invaliditet, starosna dob, nacionalnog ili socijalnog porijekla, veze s nacionalnom manjinom, političkog ili drugog uvjerenja, imovnog stanja, članstva u sindikatu ili drugom udruženju, obrazovanja, društvenog položaja i spola, seksualne orijentacije, rodnog identiteta, spolnih karakteristika**, kao i svaka druga okolnost koja ima za svrhu ili posljedicu da bilo kojem licu onemogući ili ugrožava priznavanje, uživanje ili ostvarivanje na ravnopravnoj osnovi, prava i sloboda u svim oblastima života.*

2. Zabrana diskriminacije primjenjuje se na sve javne organe kao i na sva fizička ili pravna lica, i u javnom i u privatnom sektoru, u svim oblastima, a naročito: zaposlenja, članstva u profesionalnim organizacijama, obrazovanja, obuke, stanovanja, zdravlja, socijalne zaštite, dobara i usluga namijenjenih javnosti i javnim mjestima, te obavljanja privrednih aktivnosti i javnih usluga.

Član 4. stav 1. istog zakona propisuje:

Uznemiravanje je svako neželjeno ponašanje uzrokovano nekom od osnova iz člana 2. stav (1) ovog Zakona koje ima za cilj ili stvarno predstavlja povredu dostojanstva osobe i stvaranje zastrašujućeg, neprijateljskog, degradirajućeg, ponižavajućeg ili uvredljivog okruženja.

Televizijska emisija "Interview 20" emitira se petkom u večernjim satima već duži vremenski period, a uvidom u trailer⁶ za emisiju emitovanu na dan 01.12.2017. godine u kojoj je gošća bila Arijana Saračević-Helać, utvrđeno je da je riječ o intervjuu, da su i voditeljica i gošća emisije žene, novnarke, nesumnjivo se da zaključiti da se facebook status Selimbegović Dženana odnosi na pomenute novinarke, bez obzira na činjenicu da što imenovani ističe da u status nije navedeno niti jedno ime.

Nadalje, analizirajući sadržaj facebook statusa Dženana Selimbegovića Ombudsmani za ljudska prava Bosne i Hercegovine utvrdili su da ima elemente uznemiravanja, radnje zabranjene Zakonom o zabrani diskriminacije, obzirom da se komentarišući fizički izgled Sanele Prašović-Gadžo i Arijane Saračević-Helać, koriste uvredljivi i ponižavajući epiteti, na koji način je došlo do povrede dostojanstva imenovanih i stvaranja degradirajućeg, ponižavajućeg i uvredljivog okruženja.

Ombudsmani za ljudska prava Bosne i Hercegovine ističu da pitanje kršenja ljudskih prava putem visokotehnoloških aktivnosti predstavlja izazov, ne samo za pravnike i osobe koje se bave zaštitom i promocijom ljudskih prava, već za svaku osobu, a s obzirom da visoke tehnologije ulaze u sve sfere života. Visoke tehnologije dobijaju na značaju kada se koriste za aktivnosti koje dotiču prava pojedinca posebno kada ulaze u sferu njegovog privatnog života i kada postaju objekat putem kojeg se krši prava na privatnost ili se ugrožava sigurnost osobe. Shodno međunarodnim standardima ljudskih prava u ovakvim situacijama od države se traži da **osigura mehanizme zaštite**. Dodatni izazov je kada se koriste visoke tehnologije za ugrožavanje prava osoba koje se smatraju posebno ugroženi kao što su djeca, žene, osobe s invaliditetom.

"Centar za pravnu pomoć ženama" iz Zenice je radeći na zaštiti žena i djece žrtava različitog oblika nasilja prepoznao problem osiguranja zaštite u situacijama kada se ugrožavanje vrši putem visokih tehnologije, zbog čega je sa *Udruženjem žena sudija u Bosni i Hercegovini* i grupom eksperata obavio istraživanje i konsultacije. Istraživanje je pokazalo da zakonodavstvo u Bosni i Hercegovini nema jasno definisane odredbe kada je u pitanju nasilje izvršeno putem savremenih tehnologija, zbog čega je pokrenuta Inicijativa za izmjene i dopune Krivičnog zakona Federacije Bosne i Hercegovine⁷, kao osnov za **stvaranje zakonskih pretpostavki za sankcionisanje osoba koje vrše određene radnje korištenjem informaciono-komunikacijskih tehnologija, a koje za posljedicu imaju povređivanje prava pojedinaca**.

Ombudsmani za ljudska prava Bosne i Hercegovine su kroz svoj rad također prepoznali opisani problem radi čega su **podržali predmetnu inicijativu, te je dana 13.02.2018. godine Parlamentu Federacije Bosne i Hercegovine upućena Preporuka broj P-42/18 kojom je preporučeno:**

"Da izmjeni i dopuni Krivični zakon Federacije Bosne i Hercegovine u cilju stvaranja zakonskih pretpostavki za sankcionisanje osoba koje vrše određene radnje korištenjem informaciono-komunikacijskih tehnologija, a koje za posljedicu imaju povređivanje prava pojedinaca".

Ombudsmani za ljudska prava Bosne i Hercegovine ističu da nisu do danas, tj. 13.6.2018. godine zaprimili informaciju od strane Predsjedništva Bosne i Hercegovine o aktivnostima poduzetim u konkretnom slučaju (zbog vrijeđanja novinarki na društvenoj mreži facebook), iz kog razloga nisu u mogućnosti utvrditi da li su poduzete mjere s ciljem sankcionisanja i prevencije ovakvih i sličnih situacija.

Međutim, obzirom na sve naprijed navedeno Ombudsmani za ljudska prava Bosne i Hercegovine nalaze za shodno naglasiti obvezu svih lica, a pogotovo nosilaca javnih funkcija da u svojim istupima koriste primjereniji jezik, jer njihove izjave imaju daleko veći efekat na širu javnost.

⁶ Interview 20 - Arijana Saračević Helać TRAILER, <https://www.youtube.com/watch?v=t0o79RtD6eY>.

⁷ <http://cenppz.org.ba/2017/11/14/predmeta-inicijativa-za-izmjene-i-dopune-krivicnog-zakona-fbih/>

Naime, potpuno uvažavajući slobodu izražavanja i opredjeljenja u pogledu iznošenja osobnih stavova o pojedinim društvenim pojavama, Ombudsmeni za ljudska prava Bosne i Hercegovine su mišljenja da je potrebno preduzeti sve mjere kojim će se nadležne institucije i odgovorna lica u najvećoj mogućoj mjeri uzdržati od korištenja izraza u javnoj komunikaciji, koji mogu biti uvredljivi za bilo koje lice ili grupu lica u Bosni i Hercegovini, osobito jer izostanak osude istih od strane nadležnih institucija, mogu kod javnosti stvoriti percepciju da je to prihvatljiv način komuniciranja i iznošenja mišljenja.

Ovom prilikom Ombudsmeni sa aspekta svojih nadležnosti ustanovljenih *Zakonom o ombudsmenu za ljudska prava Bosne i Hercegovine*, ukazuju na to da su organi u postupku dužni postupati na način kako je to propisano Zakonom. Za uspješno funkcioniranje institucije Ombudsmena od posebnog je značaja izgradnja dobrih odnosa između Institucija u Bosni i Hercegovini i Ombudsmena. Ovi odnosi podrazumijevaju i podršku Institucija u Bosni i Hercegovini na način da se saradnja sa institucijom Ombudsmena realizira na način propisan zakonom, preporuke Ombudsmena prihvate i ispoštuju na svim nivoima vlasti, bez ikakvog uvjetovanja.

Uzimajući u obzir naprijed izneseno, Ombudsmeni Bosne i Hercegovine, shodno odredbama člana 32. *Zakona o Ombudsmanu za ljudska prava Bosne i Hercegovine*, donose:

PREPORUKU

SEKRETARIJATU

PREDSJEDNIŠTVA BOSNE I HERCEGOVINE

1. da odmah po prijemu ove preporuke uspostavi saradnju sa Ombudsmanima Bosne i Hercegovine na način propisan *Zakonom o ombudsmanu za ljudska prava Bosne i Hercegovine*, kako je to naprijed navedeno;
2. da obavijesti Ombudsmane za ljudska prava Bosne i Hercegovine što je poduzeto u konkretnom slučaju kako bi se ovakve i slične situacije prevenirale i sankcionisale;
3. da u roku od **30 (trideset) dana**, od dana prijema ove Preporuke obavijesti Ombudsmene Bosne i Hercegovine o načinu ispoštovanja ove preporuke.

Ombudsmeni Bosne i Hercegovine

Nives Jukić, s.r.
prof. dr Ljubinko Mitrović, s.r.
dr. Jasminka Džumhur, s.r.

Dostaviti:
1x naslovu
1x u spis